

Entèvansyon Bonè



Objektif prensipal Entèvansyon Bonè (Early Intervention, EI) se adrese reta nan devlopman yon timoun pi bonè posib. Anjeneral, timoun piti ratrape pi vit lè yo pran reta yo an kont depi byen bonè. Rechèch montre ke lè Entèvansyon Bonè aplike pi bonè ki posib, rezilta pou timoun sa yo pi bon. Yo ofri sèvis sa yo bay fanmi yo atravè yon ajans lokal eta a pou sipòte timoun ki gen risk pou gen reta oswa yon andikap. Entèvansyon Bonè ede timoun piti ki gen reta yo prepare yo pou lekòl.

KIJAN FANMI YO BENEFISYE DE ENTÈVANSYON BONÈ?

- Mande yon evalyasyon pou Entèvansyon Bonè pou pitit ou a pou konnen si li elijib pou sèvis sa yo. Espesyalis HealthySteps ou a ka ede w ak sa epi eksplike kijan li fonksyone nan kominote w la.
- Yap evalye pitit ou lakay ou oswa nan yon sant ki tou pre. Evalyasyon sa a gratis.
- Evalyasyon an pral detèmine si pitit ou a elijib pou sèvis yo.
- Sèvis yo ka gen ladan terapi lapawòl, terapi okipasyonèl (èd ak aktivite kotidyen), ak fizyoterapi (èd ak motrisite global, tankou mache), ansanm ak asistans teknolojik (zouti pou ede pitit ou a aprann, pou l deplase, elatriye), ak plis ankò.
- Si pitit ou a elijib pou sèvis yo, ou ka aksepte oswa rejte yo. Si w vle, yo pral ba w yon Kowòdonatè Sèvis pou Entèvansyon Bonè.
- Kowòdonatè a pral travay avèk ou pou devlope yon plan pou pitit ou a.
- Ajans eta a dwe konplete evalyasyon ak plan an nan 45 jou. Delè sa a pèmèt pitit ou a benefisye de sèvis yo pi vit posib.
- Ou menm ak kowòdonatè sèvis ou a pral revize plan an chak 6 mwa epi mete l ajou chak ane.



ÈSKE GEN YON KÒB POU PEYE?

Pa gen *okenn frè* pou chèche konnen si pitit ou a elijib. Nan kèk eta, yo ka mande pou peye yon frè pou resevwa sèvis selon yon tarif ki varyab. Sepandan, yo pa ka refize yon timoun sèvis paske fanmi yo pa kapab peye.

ÈSKE RESEVWA ENTÈVANSYON BONÈ VLE DI PITIT OU A PRAL ANTRE NAN PWOGRAM EDIKASYON ESPESYAL?

Gen kèk fanmi ki enkyè paske patisipasyon yo nan Entèvansyon Bonè pral mete yon "etikèt" sou pitit yo. Enfòmasyon sou sèvis Entèvansyon Bonè pitit ou a PA pataje ak lekòl yo sof si ou vle. Timoun yo resevwa sèvis pou diferan dire tan. Sa depann de bezwen yo. Kèk timoun patisipe pou yon ti tan. Lòt timoun bezwen sèvis edikasyon espesyal swivi apre yo fin antre lekòl. Si pitit ou a kalifye pou sèvis apre laj 3 lane, li pral soti nan Entèvansyon Bonè pou ale nan edikasyon espesyal. Kowòdonatè sèvis ou a ede pitit ou a ak pwosesis sa a.

Kontakte espesyalis HealthySteps ou a oswa pwofesyonèl swen prensipal ou a si w poko enskri nan pwogram Entèvansyon Bonè a epi si ou ta renmen fè sa, oswa si w pa kontan ak sèvis wap resevwa kounye a pou pitit ou a oswa si w vle jwenn plis sèvis.

ESKANE POU PLIS
ENFÒMASYON

